

– Ձեր ընծան որքան հիանալի է, սրբազան հայր, – ասաց Ասլանը, – բայց խոստովանում եմ, որ Նոյնքան ես վատ հնազետ եմ նրանշանակութիւնը հասկանալու համար: Բացատրեցէ՛ք, ինդրեմ, դա ի՞նչ բանի է ծառայում:

– Դա մեր վանական արեղաների հնարած մի գործիք է, կոչւում է «տիրուհի», հէնց այդ անտան մէջ է նրա նշանակութիւնը, որովհետեւ կատարում է Նոյն ծառայութիւնը, ինչ որ տան տիրուհին կատարում է ընտանիքի մէջ: Հայոց ընտանիքներում դեռ պահպանուել է վաղեմի սովորութիւնը, որ տան տիրուհին քորում է իր սկեսուրի, սկեսրայրի եւ մինչեւ անգամ յարգելի հիւրերի մէջքը, մաժում է նրանց ոտները եւ հանգստացնում է նրանց քնելու ժամանակ: Որովհետեւ արեղաները զրկուած են տիրուհիներից, հնարել են մի այսպիսի գործիք իրանց մէջքը քորելու:

– Շատ սուր կատակ է արեղաների կողմից, – խօսեց Ասլանը ժպտելով: – Ասացէք ինդրեմ, ո՞ր դարու գործ է այդ «տիրուհին»:

– Պէտք է տասներկուերորդ դարու գործ լինի, որովհետեւ այն կաթողիկոսը, որին ընծայուած է եղել այդ «տիրուհին», ապրում էր տասներկուերորդ դարում, դա Դաւիթն էր, որ Աղթամարայ կաթողիկոսութեան սկիզբը դրեց:

Ասլանը, փոքր ինչ դժոարութիւն ցոյց տալով, կարդաց հետեւեալ մակագրութիւնը:

«Ի վայելումն Դաւթի Աղթամարայ սրբազնասուրբ կաթողիկոսի»: «Ի Հնդիկս»: – Ուրեմն Հնդկաստանի գործ է, երեւում է, հայերը վեռ տասներկուերորդ դարում Հնդկաստանում գաղթականութիւն են ունեցել:

– Այդ չգիտեմ, – պատասխանեց սրբազանը:

– Ասացէք ինդրեմ, այս տեսակ «տիրուհիներ» մինչեւ այսօր գո՞րծ են ածուում ձեր վանքներում:

– Այո՛, գործ են ածուում, մանաւանդ այն վանքերում, ուր բոլորովին փակուած կեանք են վարում:

– Հիանալի գեղարոտեստ կայ դրա մէջ, – ասաց Ասլանը իսկապէս հրճուելով, – այդ «տիրուհին» կարող է Եւրոպայի ամենանշանաւոր մուզեումներից մէկի զարդը լինել, բայց ես ինձ մօտ կը պահեմ, իբրեւ, թանկագին յիշատակ: Ուրեմն թոյլ տոնեցէք, սրբազան հայր, իմ կողմից եւս ձեզ մօտ մի փոքրիկ յիշատակ թողնել:

Ասլանը նայեց իմ երեսին, ես մօտեցայ եւ քթախոտի փղոսկրեայ տուփը, որ պահուած էր գեղեցիկ պատեանի մէջ, դրեցի նրա առջեւ: Նա վեր առեց եւ տոնեց սրբազանին, որ շնորհակալութեամբ ընդունելով, ասաց: